

## Beirniadaeth ar Gystadleuaeth 386 : Ymateb i waith celf artist o Gymru

### Beirniad – Elinor Gwynn

Dyma thema fendigedig ar gyfer cystadleuaeth. Gobeithio y caiff rhagor o gystadleuwyr eu denu a'u hysbrydoli i sgwennu os y bydd yn ymddangos yn y dyfodol. Y tro hwn, tri pherson fentrodd i'r maes.

Sbardunwyd **Seren**, wrth ymateb i lun o'r machlud gan Ernest Zobole, i sgwennu am berson ifanc yn ceisio delio gydag emosiynau wedi i berthynas ddod i ben. Mae'n nos Galan unig, a'r person yn cynnal sgwrs â hi ei hun. Mae'n edrych at y dyfodol, ac yn herio ei hun i wneud pob math o bethau yn ystod y flwyddyn i ddod er mwyn ymdopi gyda'r torcalon y mae'n ei deimlo. Mae sawl adlais o lun Zobole yn y darn – perthynas yn machludo, ffrwydriadau lliwgar y tân gwyllt yn ysgogi fflyd o feddyliau a rheiny'n chwil fel adlewyrchiad yr haul ar fôr llonydd, tywyll Zobole. Byddai ychydig o dynhau ar y sgwennu wedi cryfhau'r darn.

Ymateb i lun Eleri Mills o lôn fach wledig yng nghanolbarth Cymru a wnaeth y **Cawr Mawr**. Ysgrifennodd bedwar darn byr, fel 'vignettes' – pob un yn cynrychioli llais unigolyn gwahanol sydd â pherthynas gyda'r darn o gefn gwlad y mae'r lôn hon yn rhan annatod ohono. Byddai ychydig mwy o ddatblygu cymeriad a saërnio sefyllfa, ym mhob un o'r darnau, wedi cryfhau'r ymgais i mi ond roedd yma syniad da, a'r cyfanwaith yn cynrychioli ymateb uniongyrchol ac ystyrlon i'r gwaith celf a oedd hefyd yn peri i rywun fynd yn ôl at y llun a myfyrio ymhellach arno.

Dewisodd **Medi** ymateb i ffotograff hafaidd gan Jude Howells o arfordir Penfro, wedi ei dynnu drwy adwy gardd furiog, flodeuog. Ond tywyll yw'r stori – am ladd, erthylu, tyndra teuluol, cancr a thristwch bywyd yn ei gyfanrwydd. Stori rhy fawr a chymhleth, yn ei ffurf bresennol, ar gyfer y gofod. Byddai canolbwyntio'n dynnach ar y berthynas rhwng yr union lun a ddewiswyd ac agweddau penodol o'r stori wedi helpu efallai yn yr achos hwn.

**Cyntaf** : Cawr Mawr (386/1). Dim rhif aelodaeth

**Ail** : Seren (386/2). Rhif Aelodaeth F61902

**Trydydd** : Medi (386/3). Rhif aelodaeth F17630